

白  
華  
前  
稿

白華前稿卷第二十

南漚 吳省欽 冲之

書 贊 辭 頌 策問 題名

與顧晴沙書

昨郵便奉到大集墨板工擅益州不知何時似今坊本  
展此足爲彼生色也一書兩序無害惟序後遽附王跋  
跋燭本也足後也今跋卽古後序古以序自序繫本書  
之末書序詩序皆然三史亦然其以後序爲跋盛自兩  
宋廬陵東坡山谷益公簡齋晦翁鶴山諸君子至有題  
跋專行王君係門下士言跋故謙詞似當移置卷尾附

刻詩始於韓集殆李漢編入若杜集附嚴武高適韋適  
元結詩自劉辰翁編入近海寧查氏慎行蘇詩補註附  
轍過詩俱不繫其姓三國志董和傳後有董允傳裴松  
之曰陳羣子泰陸抗子遜皆以子繫父不載別姓惟董  
允傳獨否此史例則然杜集有杜位韓集有韓重華卽  
曝書亭集附弟朱彝鑒詩尚從其例尊伯叔兄弟不宜  
援史例之不繫姓也行數區區識者展卷卽見執事好  
古而學乎古用敢以言相執惟鑒擇焉

與朱畫莊書

頃誦縣志六篇以新造之邑爲無米之炊體例謹嚴蒐

采明備過康氏之志武功遠矣其皮毛枝節無害於義  
例而當改正者如卷首結銜繫臣字篇中則繫畫莊朱  
氏古經進之書如劉向校七略薛瓚注漢書裴松之注  
三國志皆稱臣近時敝郡王司農鴻緒表進明史藁其  
板心稱橫雲山人集遂停頒發又新令府州縣志先上  
禮部勘覆然後布行今志未經呈覆則臣字似可節去  
至本官須繫本階如未奉勅授書官不書階可也石  
谿亭詩騷壇今改詩情騷之傳者祇屈揚二篇非如作  
詩者之多可云壇也歷城家明府當改從朱東坡有次  
韻子由送家退翁知懷安軍詩退翁謂家定國蘇天爵

元文類載林霽山有家大參歸自北寄呈之作大參謂家鉉翁則堂定國鉉翁皆家姓非本家之家嘉隆後詩文每以同姓之某爲家某無所依據拙序無可觀行篋中亦無一卷書可資考證者益以念作者之甚難也

漢陽試院流萬堂贊

并序

德與功與言舉足以不朽而言之中有德與功者存徒以言而以文以時文其道未爲尊其爲澤亦易斬矣詩賦者唐宋之時文經疑經義者元明以來之時文以經義異同詔諸儒講議自漢宣帝章帝始也以論語孟子大學中庸爲四書自宋朱子始也以四書發題試士創

八比格曰破題接題小講大講後講考經結尾名曰書  
義自元仁宗始也明之文莫盛於江西五家然以視隆  
萬人異矣以視正嘉人又異矣以視洪永成宏人抑又  
異矣以晦盲否塞之象激爲噍殺之音取便於空疎不  
學以驚世駭俗而明亦於是乎亡其所爲盛乃其所爲  
壞焉者繇我朝龍興漢陽熊氏伯龍交其於道不知  
何如而敦重宏達見開國氣象旣上第榮世其傳世亦  
久且遠當時有竝稱之人要無竝稱之實嗣求其古文  
詩詩間具一二杜理古文則應酬率率大都出自門客  
之手絕不類其時文用是歎藝之至者不兩能而科舉

之業有開必先。是直運會使然。熊氏際其盛而能鳴其盛也。漢陽諸生童何集武昌附試。雍正二年分設湖北湖南學政。漢陽遂議建棚。熊氏之孫旃推故宅入官。廣置院舍。事在雍正七年。其產盡斥而府新志不之載。院中亦無碑版可考。幸學官師弟子尚能舉其功數傳而後知之者。當已僅矣。予惟前明楚產如楊忠烈。漣熊襄愍。廷弼賀文忠。逢聖其人皆有以自立。當按部時遍訪其後人。冀示廣厲而有與試有不與試者。以熊氏之交爲能立其言。而其孫復爲功於漢陽之諸生。童視唐某人之舍宅爲佛寺者。誠遠過之。因求旃從子光光子培。

仁錄之前列竝取杜詩不廢江河萬古流之義偏院之  
西堂曰流萬然則世之志乎古以立言者其傳世豈反  
出時體下哉贊曰聖言孔彰誕習科舉尊爲四書效作  
八股揣摩朱訓糟粕漢詁流失旣多體裁孰取斯人奮  
興 盛世揚詡載黜等瑟賁鏘冀庶載屏續綿繡締猷  
黼淳穆斲雕端嚴疊矩中壽奄徂高文久睹維漢入江  
自我行部有塗有門有寢有廡有舍者席有闔者堵今  
開廣場昔宅安宇言捨入官逝將芘女人在地存文今  
質古伐碑著銘志乘埃補

白華堂玉章贊

并序



予籍諸生時負米九江居停者以予之需秋賦也舉西  
陽雜俎所載吳剛事號之曰月樵或以款刻月樵玉章  
遺居停者居停者轉以遺予予爲作長歌厥後鄙其事  
持易米二石度禮歲而束哲補亡詩洪景盧雖不謂然  
然不失乎律已之道事親之旨因改號白華隨所居編  
曰白華詩屋屬武進黃景仁仲則銘一銅印己亥秋自  
浙使旌假道省墓喬鍾沂樸園遺予舊玉章曰白華堂  
者圍四寸四分高八分脊起爲四阿而下方廣質理斑  
斕近亦五六百年物也語曰非人磨墨墨實磨人背之  
名是堂之人旣無得而徵予之堂以四百緡購之郡西

郭之錢涇距下沙故居幾三舍每念景廬所譏士大夫發蹟隴畝多以醫藥弗便飲膳難得自啣啗遷於邑自邑遷於郡翩然去之或遠在數百千里之外如歐陽公爲廬陵人其父崇公葬里之瀧岡而公中年乃欲居穎見之思穎詩序無一語及於松楸今予購而堂之不必終且居之而玉章之文巧合符節若梵言補陀落迦山唐言爲白華山予固未暇以游要亦非所願矣是故堂統於屋而詩屋則統於堂堂與屋皆曰白華則猶歐公在夷陵因至喜亭之名名至喜堂云爾贊曰有塊者璞其文窅窅印之丹質堂曰白華先我而堂自我而屋且

屋且堂重茅純束惟白守元惟華養根言復其始廉恥是敦

當陽汪貞女義田碑贊

并序

男女子生三月而命名男子子二十而冠冠稱字女子子二十許嫁笄而字雖未許嫁年二十必笄笄必以字易女子貞不字字謂許嫁後稱字也以字謂許嫁誤也嫁不以再嫁故許亦不以他許禮曰既納幣有吉日女之父母死壻使人弔如壻之父母死則女之家亦使人弔言先行弔禮也又曰壻已葬壻之伯父致命女氏曰某之子有父母之喪不得嗣爲兄弟使某致命女氏

許諾而弗敢嫁弗敢嫁弗敢執吉以來嫁也又曰壻免  
喪女之父母請壻弗取而後嫁之請者請尋吉日也壻  
喪畢而未以復請故女氏反以爲請壻之弗取壻之未  
遽忘哀嫁之者嫁此壻也疏以謂男氏許諾而不敢娶  
女家不許壻而後別娶夫以有故而不得娶遂至聽其  
別娶男旣別娶女必別嫁先王無此黷禮之政也此鄭  
氏之失也女之德貞而已在其國爲女在塗爲婦貴其  
成婦不貴其成妻予叔母胡孺人之妹許嫁錢存厚子  
妻查淑人之妹許嫁宋森聞訃守志爲聞見所不忍有  
引周禮禁嫁殤及曾子問不遷於祖不祔於皇姑壻不

杖不菲不次歸葬於女氏之黨之義以折之不爲稍動  
事舅姑無缺禮歿而爲之葬蓋不成妻而成婦者且禮  
爲殤服雖嫁殤有禁而周之時固已嫁殤以臣不殤君  
子不殤父之禮爲言女子之不可殤其壻亦猶是矣天  
下之害生於不及情不生於過情故曰可以取可以無  
取取傷廉可以與可以無與與傷恩可以死可以無死  
死傷勇聖人緣情制禮禮仰天理之節文歸氏以女子  
未嫁而爲夫死且不改適爲非禮毛氏奇齡記李孀守  
志事曰歸有光曰未婚守志非禮也古父母死卽改嫁  
不待壻死也有光固未嘗爲此言而孀許嫁後嘗同姑

臥起正其成婦而不可絕者當陽汪氏女蘭英許嫁傅立立殤汪年十五歸傅樵汲養其姑廿年而姑歿今年四十餘矣守志不貳鄉黨共稱予以蘭英之成婦而養其姑近禮而足以爲教又憫其不給於養率錢三十緡竝郡縣官師弟子錢三百緡屬縣令慈谿范鐸經紀其事買田記之碑而銘之其辭曰刲股近名殉軀慕烈未嫁守志於義履潔蕙湯苟奉礪帶宛結律已特荷風世較拙爲江漢游懼廉恥缺悠悠長阪皦皦同穴喪過乎哀貞囚其節置波薄田茂教是設

白雲送老圖辭并序

雲之爲物汗漫而不可方故夏鼎繇曰逢逢白雲一南一北一西一東山林嘉遯之士往往託以自喻而學仙者流復有乘白雲遊帝鄉之歎崔顥黃鶴樓詩兩言白雲猶此志也雲之象旣閒其於迹又已幻然易之言大人曰雲從龍記之言賢人曰天降時雨山川出雲惟所從旣隆而澤由之以降降之澤豐嗇不一而物之遇之胥有以濟乎其時時以濟矣雲之出者當有所歸矣然方其出而未歸若不能無心於歸此歐陽文忠在政府時以歸田名其錄九文簡在侍從時以遂初名其堂而雲岫中丞自雲送老圖亦以之作也圖有嶠有巘有嶧

有徑有谿有澗有澗有松杉栝竹楓櫟有屋有橋有屋  
皆有人蓋斷取杜子美秦中雜詩第十四章末語意爲  
之或疑子美詩始欲卜東柯谷以居繼欲卜仇池穴以  
居願不獲遂迨入蜀始有草堂稍有寧宇彼所遭之嗇  
公視之奚啻霄壤卽淵明所云無心出岫者亦未有乘  
時及物之會而後之論淵明詩者喻之絳雲在霄卷舒  
自如人之由少而壯而老猶雲之由舒而卷公以出岫  
之雲自喻而駐節之地在白雲黃鶴之交由作圖之意  
以推凡所爲不獨老其老者茅檐暴背與白雲長氾濩  
於無窮是則公之自怡悅而舉堪持贈者夫辭曰茅蓋



屋兮面水，雲英英兮露彼山。有桂兮淹明，垂九天兮蔚起。羌雲行兮遲遲，復雲停兮止止。眷徜徉兮予懷，曰自得兮素履。

俞孺人旌節頌

并序

漢陽俞孺人爲太學生臣鵬女，年十五適同邑張繼鉞，十九生子大海。未時而繼鉞卒，乾隆四年月日也。三十四年，邑之人籲所司旌於朝。是冬，孺人卒。卒後七年，以大海官武昌府學訓導，贈孺人。又二年，大海舉鄉試。又四年，被薦當去爲縣令，乞爲文傳孺人，夫孺人之節。縣府司院官言之而繼鉞有四兒，多以科貢舉孺人子。

身尊紉養且教其孤以有成則夫致孝致哀於其舅必敬必睦於其姊其事舉可以信而書或缺有間焉唐應德曰明初修一統志兩人相謂其一欲載科目則曰此非進士錄也其一欲載戶口田賦則曰此非黃白冊也科目別有錄矣不載宜也戶口田賦天下之大命彼禹貢職方其亦黃白冊也哉閻百詩曰萬季野曩謂予撰一統志奚必及人物人物自有史傳予甚駭其說及覽元和郡縣志太平寰宇記意果不重在此一州內人物或無或僅姓名貫址卽間舉生平亦寥寥數語不似明統志誇濫省欽曩在志館其體例所收人物甚嚴惟受

旌婦女槩得登記然如孺人之貞苦以昌其後者卒不多見故粗舉其略俾書之門閭侯志郡邑者錄之以繫典型而補世教云頌曰彰善樹聲表宅表里以此坊民卓哉女士漢女曷求喬木曷休其風信美歌於有周及笄而嫁奄喪所天呱呱泣哺書能書賢夫稱贈公里號節婦中壽不延恩言幃覆舅胸載滌鄰桑勿爭瞻言綽楔無窮令名

乾隆三十五年廣西鄉試策問 二首

問易書詩禮樂春秋古曰六藝亦曰六學其曰經孰昉與四經五經七經九經十一經十二經十三經異同安

在唐選舉分大中小三經何與易有三義上下經分卦  
其數何以不齊費氏學荀氏九家學有傳於後者與左  
傳以罪疑惟輕爲夏書說文以五品不慈爲唐書其有  
說與堯典三辰何以異於益稷謨舜典五禮何以異於  
皋陶謨詩三經三緯何若逸詩篇目甚夥孰有辭孰無  
辭儀禮歌召南何以越草蟲而取采蘋笙詩何以不當  
補春秋四繫五例以元訓仁以夏時冠周月果聖人之  
旨與三傳紀載褒貶其不同者何事周禮儀禮其本書  
之名何在司徒不言財司馬不言兵鄉射禮罰爵以豐  
冠義有士無天子諸侯大夫能一一條說與多士際昌

明經學之 朝研肄當有素矣其以所得著於篇

問自古載籍極博諸史而外足以備歷朝之掌故括百  
氏之源流大而制度典章細而名物象數綜甄畢具者  
大要莫如三通名爲通何與唐劉秩攸周官禮著政典  
三十五篇杜佑廣其未備成通典二百卷宋鄭樵變其  
義例成通志二十略馬端臨廣杜氏之規模正鄭氏之  
疎舛旁掇論奏間附心裁成文獻通考三百四十八卷  
斯三者增損因革分門果何似與通典所載自皇古以  
迄開元亦綦博矣乃析賦於田制之外雜貢於稅法之  
中選舉則孝秀與銓授同科典訓則經文與傳注相汨

何與鄭氏詆杜氏借書炫名其自序通志至有云非漢  
唐諸儒所得聞然職官選舉諸略多仍通典原文至若  
略陳碑版遽該金石撮言象緯欲括天文可與天寶以  
後淳熙以前宜有纂述而通志闕如或別有說與通考  
雖倣通典而本經史之記載稽儒先之緒言夾注處尤  
極完善乃王氏圻譏其詳於文而略於獻然與否與我  
皇上右文稽古嘉惠士林 特命詞臣校正三通竝  
續成通考近復

勅通典通志一體開館續修甚盛典也諸生涵泳

聖涯他日皆有珥筆編摩之任其以素所研辨者剖析

言之毋隱

乾隆三十六年湖北鄉試策問 二首

問延洪旣臻引年示禮禮天子視學遂適東序養老鄭  
康成謂養老在視學明日然與仲春仲秋入學有養矣  
其有歲養何與燕禮饗禮食禮其不同安在周之兼用  
見於詩周官及祭義者何若鄉飲何以立三賓養老何  
以立三老鄭氏旣云三老象三辰五更象五星而又云  
各祇一人何故蔡邕以五更之更作叟證之張湛注列  
子田更作田叟則鄭氏老而更事之說非與漢初歲首  
遣人存問三老卽養老於鄉之義明帝以李躬爲三老

桓榮爲五更而國老庶老之外其子孫死政者於禮亦得有養我

國家仁壽縣庠安懷洽慶貴齒之禮視古特隆躋斯字者盍數典以對

問古者竹簡曰策其尺寸長短有見傳註者與以謀訓策始自許慎與發策射策對策有異與漢鼂錯對策首云平陽侯宙等所舉賢良方正太子家令臣錯何直書已名與唐時有沿其體者與虞世南倣應科目策自設問對引經史注之謂之兔園冊豈科舉陋習如是與抑非必世南所作與制舉策有載於史者與以策題曰策



文自何始與唐及宋初策題甚簡仁宗後寢失之繁有  
至數千言者何以故也元經疑經義略如發策對策明  
以鄉會試第三場發策故楊慎譏舉子抄節史事綴爲  
策套夫發策之患在問所不足疑對策之患在對所未  
嘗問頃者頒示令格凡策題毋過三百字對者毋泛  
引不根誠崇本厲學之意也多士其酌古言之

乾隆四十四年浙江鄉試策問 二首

問湯誥言性之始說命言學之始二者尚矣言心始仲  
虺與書古文人心道心有他證與論語三言心兩言性  
中庸言性不言心而程子謂孔門心法何與大學言心

及意孟子言性及情何與性兼心言曰心性兼命言曰  
性命其曰性理何與有義理之性有氣質之性曰恒性  
曰率性德性曰知性養性與性相近之旨可表裏與荀  
卿韓愈李翱之言孰當與道學之名始於宋朱子謂周  
子一生之學在太極一圖然其陰陽五行之位與陳希  
夷無極圖適相倒易凡同異醇駁可切指與金谿姚江  
爲世滋詭豈其學果禪學與抑攻之者已甚與大抵心  
性之說援之則涉於宗門學問之途粗之則溺於訓詁  
皇上聖明天縱盛德日新治理所昭淵源精一蓋君師  
之統萃於一人矣多士泳游 聖涯服習儒軌有心

契乎性道間者願稽聽焉

問古有事於學者三月令學正習舞釋菜其名見諸周禮與周以前有舉者與釋奠之禮視釋菜釋幣何若與孰用尸用樂孰否與同謂之釋何與若山川廟社之祀亦釋奠與入學釋奠自四時各舉而外何時何事載舉與春夏舉自太師秋冬舉自何人與始立學則釋奠先聖先師豈先師不嫌數先聖不嫌疏與先聖果四代各尊先師果四經竝立與周公孔子顏子遞爲先聖先師可歷考與古釋奠在學不在廟抑有說與漢高祖以太牢祠孔子後魏孝文帝親祠孔子史何以不書釋奠與

書釋奠孔子在何代與夫褒崇之典歷代各殊如何而始爲定制與我

皇上道洽治隆心源軌一辟雍闕里屢已光昭

法駕矣乃者熱河建學文廟落成所謂始立學而釋奠聖人乃能行之也盍詳見於篇

蒙山智炬寺題名

癸巳八月乙未省欽旋試寧遠道出名山名山令劉以正促易筍輿抵智炬寺飯陟雷動坪至五頂揭甘露井覆石煮副仙茶半甌倚石闌闌上落髮扶寸觀大仙副仙東西配諸茶樹樹不及二尺人未嘗見其滋長四川

志及明人碑並云仙茶西漢甘露禪師植西漢佛教未  
入禪師之稱坊自晉卽東漢猶稱道人也五頂若貫珠  
一石殿庑而緻其面爲觀音堂瓦屋鉢盂諸山遠近鱗  
簇平羌江如玦遶之支策返寺邑諸生李蘭技能刻石  
劉預礪以待同遊者予邑人姚蘭泉門人蘄州陳祐濬  
返馭入城僅五里雨翻盆下劉言揭井石則雨隨至茲  
尚幸也又言嘗發茶畔土磴道忽震撼懼而止往歲天  
戒寺林竹盡花小金酋始干討劉令此十年時禁旅垂  
過焚糧星火偕選勝游非直地主賢師行抑衽席矣越  
三日自邛州使院書而歸之

古慧義寺今琴泉寺題名

少陵有陪章畱後惠義寺詩又山寺詩原注與章畱後同遊其云野寺根石壁諸龕遍崔嵬前佛不復辨百身一莓苔爲今千佛洞無疑矣寺在山上故陪四使君登寺詩曰樓閣寄山巔太守沈清任葦田於山下得武成二年惠義寺石幢知王蜀時尚仍唐寺名不知何時始稱琴泉寺也侯圭以梓之州列浮圖一十二而慧義在北慧通惠也寺故有塔今僅存敗址志地者當知之

崇聖寺題名

唐進士宴櫻桃觀舍利佛牙皆在崇聖寺寺名遞改至

明而曰崇仁歷久頽廢乾隆癸巳正月予視學赴蜀鎮  
洋畢公沅以方伯權大中丞事要遊雁塔西折遊此董  
役伊始無足觀也今丁酉除夕前二日返觀至秦道出  
寺後訝其非常偉麗而公爲真大中丞者且三年矣爲  
言監司秦隴時見茲寺露處臥佛尚係唐塑石匣經係  
元奘手取莊嚴宛在屬曹宮允仁虎於翊午偕予先往  
而公繼至禮讚竟日復以碑文見屬念當代詞館松太  
人特多公蔚居選首於軍興時建非常之原宮允持服  
未闋爲公修同州府志薄爾幕府以予之陋不爲人所  
鄙同鄉同館聚覽今古後之來者安知不繼勦宴而舉

勝事也夫

武昌西山題名

自黃岡陸行至華容六十里渡社樹與渡樊口遠近等  
乾隆辛丑四月十九日李太守國麒李大令敬敏偕包  
都督定邦出清源門送予謂放舟至武昌縣郭入西山  
良便李大令維壻亦走使具邀飽帆竝下涉歷沙岸衆  
綠相委望郭門不暇入穿枯壙半里許石徑始豁一磴  
一折坐九曲亭亭高不十仞而坐見樓堞江色繚之返  
景則袍袖盡碧密樹無間再上爲靈泉寺寺門外翼以  
亭瞰寒溪懷懷作冰雪氣寺有三泉井井旁石澗靈龜



冰焉澗石爲古根所穴蔭可滿院寺僧冰谷方事鳩葺指後殿爲吳大帝避暑處東憩棧閣閣下有劍池越閣外小徑滑汰其東北卽寒溪西上里許是山最高處犖确不可措足陰翳旣盡劍石在焉予跌石良久諸君始至輒謂予有濟勝具相與枕樊山而南樓隔江望巴湖若大圓鏡縈青繚白侑以壺酌歡盡始返書此以識游跡云

象牙山題名

熊耳山以兩峯相竝得名在盧氏縣馬耳山亦以雙峯名在諸城縣眉州彭山縣東北象耳山予未及以遊而

載在統志。今施南府治在象耳山麓。上有元妙觀。岡脊所垂。爐若錫若。府志載明人詩。亦作象耳山。而居人猶間稱象牙。象不以耳稱。耳牙文相近。不止牙郎爲牙郎之誤矣。因改題曰象牙。陳太守嘉謨爲省欽勒之石。

白華前稿卷第二十一

南匯 吳省欽 沖之

傳

明四川東鄉縣知縣趙公傳

公名德遜松江人天啓甲子舉人知東鄉縣我

世祖章皇帝順治二年張獻忠遣劉文秀分掠川東六月賊至公預練鄉勇拒守闕片七月十二日縣役董二麻應賊城破公與其家八人者入井死有邱榮和者亦被執以間得脫踰年獻忠誅公子求尸處不得榮和告以井所乃刺血糝遺骨驗視公所佩石與玉有三乃卽

葬之而以石玉酬榮和榮和有女孫歲貢生冉士選之母也石玉今藏士選家

論曰昔明社將屋盜賊蠭起民不聊生不知死所張獻忠據武昌鑄西王之寶李自成自襄陽貽書脅讓左良玉復將西上獻忠乃決策入川首陷夔萬僭位成都遣將分道屠僇謂之草殺殺人不可億數計子行部時往往求忠義士死處而自重慶三忠祠外多不可考惟東鄉士人言城內有趙公祠公所入井尚存士選手狀以上竊考彭侍御遵泗所爲獨碧言甲申賊至東鄉恩貢生冉璘及其子宗孔被執不屈死而不及公公之死在

乙酉則東鄉之焚掠必非甲申我

皇上彰輝宸鉞嘉憫明季死事諸臣子專諡者二十六人通諡忠烈者一百十二人忠節者一百九人烈愍者五百七十六人節愍者八百四十三人館臣論次事實爲勝朝殉節錄表忠發幽曠越曩古公之名惜未獲聞江南選舉志并不及公姓氏予幸爲郡人而里籍亦未暇以考謹據士選之狀書之俾刻諸祠俟異時考證焉

順天府北路同知李君傳

君諱化楠字廷節石亭其號也絳州羅江人封文林郎文彩長子乾隆七年成進士十七年令餘姚姚邑故瀕

海賦重民翫多去而爲盜君以次掩獲構屋二十餘間  
局之名曰枉生所擇民技能者爲之帥假官錢資令爲  
業業成其師具狀保之出終其身不復犯偷歲祿君預  
籍輕重待賑賑務爲兩浙冠調秀水復攝平湖前令某  
在湖七年積訟牘三千有奇君計日定程飲食皆坐堂  
上早午晚決若干件縱民觀聽民爲之歌曰雲霧七年  
三月見天而令甲州縣官本任不以繁調繁去之日湖  
人傾城扳送哭聲震野浙撫今直隸總督楊公以治狀  
聞會丁文林君憂服除特旨以同知發直隸補用假  
牧滄州州藪盜各省案提者如蝟君籍戶口狀貌小字

無不實以是隨提隨得曹家莊多回種日殺牛聚會夜  
則四散爲姪君忽於夜半挾弓矢率健卒數十人擒其  
魁餘論如法盜爲之空假牧涿州補天津府同知以內  
艱去服除仍赴直隸候補照牧霸州薊州補宣化府同  
知遷順天府北路同知督密雲懷來平谷諸城工懷餅  
餌以油傘自蔽巡歷風日中一瓦一石毋有蠶濫又兼  
攝密雲縣事自某冤行在慮囚甚亟君以獄詞未定  
畱不發幾挂吏議

上行園木蘭君迎伏道旁

上笑謂扈駕諸臣曰是李化楠耶可謂強項矣人謂

上有嚮用意卽大府益以重君京師奸人翦辮者詞連  
數省無佐證君固請無動已而他省之周納者多得罪  
密雲令任某以事被劾君讞得實矣有齟齬君者力持  
之君憤懣不得申先是令浙時痰常錮心至是又患恆  
忡祀竈日以事過都門購參餌自隨越二日入會城命  
從者淪茶忽解所佩刃自刺茶至從者驚相呼君躍然  
起曰我安得血被手耶利未深然亦竟不治聞者皆記  
嘆有泣下者君讀律成誦凡案牘皆手自評斷嘗言居  
官有六字訣眼到身到心到又曰一錢一票似甚微當  
之者一家哭矣精九章法儲穀有不能算者一布指卽



知其數其所治率極衝時巡秋獮俱頓立辦無浮費無  
浮派也通籍廿年祿養備至其衙卹也會葬者千人於  
雲龍山立家祠置田贍族少時耕且養據隴上挾書而  
哦少情文林君授以礫故君左領有瘕羅江入本

朝成進士者蓋自君始云藏書數萬卷皆自浙載歸他  
生產不復問所撰族譜八卷治畧二卷石亭詩八卷

贊曰君以壬申校浙闈得沈君祖惠爲解首士林多稱  
之要其獲上治民不媿古循吏矣疾由心作天若憇之  
然君之沒未幾而忌君者旋以他事敗獄亦卒如君所  
讞天人之理固若斯不爽也抑可以無憾矣

封中憲大夫顧公別傳

公諱建元字振川姓顧氏自吳相醴陵侯雍著望江東元通判潤之始居無錫尤傳至廣東提學副使鏞是爲公曾祖祖敦考選知縣父候選州同禧兄弟凡八人就塾爲舉子業皆以爲不若旣乃嘆曰讀書不爲善縱得第何補於世於是仿高忠憲同善會令一人集十人人日輸一錢或米一溢瘞捐瘡給寡婦之不朝食者其厚者聽積十年得出二百畝若施衣施藥施棺放生惜字諸會垂五十年以爲常脩學舍脩七世祖洞陽公祠尊賢祠營道成梁產不過千金而爲善日不足往予視學

入蜀公之子光旭權按察使每示公家問語嚴至不及  
生產事其最精者曰除弊恐利去在正已而已正已則  
弊自絕興利恐弊隨在因民而亡因民則利自溥當光  
旭去蜀蜀之人如有所大戚感泣扳送千百里不絕予  
不知光旭之感蜀人何以如是深卽公之所以教光旭  
者何如是而猶未慊也公生時母呂恭人夢道士乘五  
色雲入室繼母病禱石門之白鶴道院有應後十八年  
復病禱瀕湖之鎮溪菴夢真武神持大圓鏡垂絲帕丈  
餘於地復起輯青年金鑑錄若干卷爲長洲彭尚書啓  
豐講大洞經晚歲居錦樹園倚池檻觀水輒盡日出則

續碧山會賦小詩爲前後十老圖以光旭歷御史甘涼  
兵備道累封如其官預知臘庚申厭世年六十九及見  
光旭子永之舉京兆試

論曰無所爲而爲善之大者也然易言殃慶書言惠逆  
後之君子藉以去不善而力於善積之既久將言與行  
與心無非善者善之長曰仁仁之本曰孝弟其推暨曰  
民物始公亦涉道家感應之說而設誠致行油然而粹然  
卽子瞻蘇氏所云其生有自來其死有所爲理或然也  
曰別傳別於史也

潘建南傳

歲乙丑予赴郡試童子科時吾邑有以行義受太守旌  
者則潘君建南國錦也君祖母奚蚤寡撫君父及見君  
嶄然頭角時命之私淑於王高士光承之門故君每以  
孝弟力田爲已志君外舅年七十而未有後君資之暖  
老或誦亭林顧氏之言曰焉有勸老人買妾而可爲君  
子者乎君反覆辨論爲買之卒生二子子孤君紓其家  
難俾至於成人君弟有二子皆上殤亦爲置妾妾所生  
子又殤乃立後而嫁其女有族子陷爲盜禍且不測君  
請於廉使者事得直又以祖母奚苦節數十年而揚顯  
未之遂也請有司上聞如制 賜金立坊於墓所方

墓之未卜也。形象謂葬且不利。君泣然流涕曰。吾祖歿五十年。吾祖母歿十有三年。今吾父見背。又七年矣。及身而不葬。誰與葬者。且向者猶以力不舉。吾以下之於天。脫不利。吾自當之比葬。亦無他。他好義事尚多。不具載。載其聞於君嗣周緒者。

論曰。古人子之葬其親。墓大夫爲之辨冢域而已。不克葬者。無有也。自葬書以化者邀福。而惑其說者。暴骨且至累世。亦與於不仁之甚矣。論者以君存亡繼絕之功。如僕沈華死。且爲之置後。而不知其卓然不惑於地師之言。爲尤不可及也。鄉飲酒而行也。非君其孰當之。抑

子又以嘆循吏之難而積善者之爲有後也

### 李節婦傳

節婦程氏，塾江人。雍正七年，年十九歸李。嘉禾不二年，嘉禾沒，誓將殉焉。其姑曰：「乳也，舅嘉禾不死矣。且如我老何？及乳生枝榮，枝榮少戢疾，所受產不百金。婦哀過失明，以姑命攜枝榮育於程。踰年而嘉禾之兄歿，婦誓與姒陳偕撫其孤。又十餘年而嘉禾弟又歿，婦奪志於人，婦撫其二女至嫁。每寒食上塚，攜枝榮偃偃然泣曰：『天苟有後於李，雖餓死，不恨。』夜坐績苧，麻課枝榮讀，至漏三四下，以爲常。枝榮餓於庠，婦目明漸復。乾隆二十

六年

恩詔舉節孝學之師弟子將以婦應則嘆曰

爲人婦不幸而以節名曷若爲子者成名以名其親乃止方予按忠州遴試拔貢初不知婦節而枝榮年四十餘視其人哂然又卹然若有亡者州之人以謂不得當也此舉而交口頌曰是故節婦子固宜枝榮請予爲之傳予以桂李皆邑士族矢節祇恒德立傳非體因舉陸魯望見忠孝志義之事則銘之之言復之乃銘幽不可以葬後作會婦之兒子正坤需次次京邸請益力嗚呼世之被旌者多矣其節不必如婦之苦而禮官籍之一統志遂據之載之婦直以枝榮窶不能請旌而陳義甚



高枝榮固有深痛者其亟請於予以冀不死其親固人子之義云爾然則既其實而名湮沒不彰者又何可勝道哉

程氏二節婦傳

李氏塾江人生崇禎九年年十八歸拔貢生程瑞雲二十八而寡子鴻僅周兩晷直萬縣餘賊煽掠李以遺產令瑞雲族子大器經紀而已負鴻入深山累旬不火食鴻舉鄉試奉李復故居與大器均其產鴻卒年二十六耳子文駱九歲文驛七歲鄰人牟其產將併害之李與鴻婦廬計匿文駱文驛於萬縣程謙之謙之故鴻族且

同年後十餘年二子爲博士弟子婦始得與母祖母見  
李卒時年八十九廬年七十婦姑相守五十年顛沛荼  
毒文驛孫今仁懷縣令正棟輒爲予泣且言曰吾高祖  
母曾祖母之節苦矣非是程安得有後有後而懼不傳  
敢請抑予聞瑞雲與義士十七人守西山中噉寨賊李  
鶴子余大海圍之三月餘不下少保李國英攻毛蘆山  
賊爲連饋出巫山敘題知縣未除而卒非直李若盧賢  
也年代稍遠旌格限之正坤苟以是推民隱而毋枉且  
濫焉亦賢者之用心爾矣

孫宜人傳

宜人興縣人孫姓故尚書協辦大學士文定公族女年十八歸廣信守康基淵基淵少孤與兄故太學生基某今開封守基田奉母教砥厲學行歲入穀不十石宜人偕妯王春驥織紉雖寒暑輒至夜分王歿宜人獨承之凡妊男子四以免卒年二十九時乾隆丙子八月日也歲甲申基淵筮仕爲嵩令奉母之官母泣然謂宜人子儀鈞曰微而母吾不有今日吾以乙亥秋中寒疾而伸父教諭繁峙而父館千里外而伯父具醫藥而母所籲抑搔累月不交睫少間進吾食日夜十數餐餐一二勺懼吾間瘳疾再作也疾起而而弟倫鈞痘痘已尋痢

而母奉吾而乳而弟其不任免固也卒之日惟叢殘絮  
布二箒皆綴統所餘吾嫂哭之吾姪之婦又哭之言每  
急必告而母而母脫釵釧質衣裘以爲常而不知貧若  
是也而九歲喪而母而不知而母固也宜人歿十二年  
餞鈞舉鄉試又七年倫鈞繼之又六年遇慶典於例  
當贈恭人乃基淵已貤贈其上世遂以餞鈞官中書所  
晉級贈宜人

論曰予讀歸氏有光狀其母周勞苦若不謀夕兒女大  
者扳衣小者乳抱手紉綴不輟中夜促有光暗誦孝經  
無齟齬乃喜未嘗不痛劬勞之恩至斯爲閭極也母富

貴家易得貧賤家難抑婦又甚難也今太守富貴矣宜人偕其苦爾不偕其樂此儀鈞所爲乞傳也儀鈞又言幼學時每歸宜人必篝火課所誦書五十過不熟卽撻之慈惠若彼孝義若此信乎無命而有其德矣嗚呼獨宜人也乎哉

歐陽貞婦傳

貞婦歐陽氏安福湛水人幼失怙母兄授以列女傳女訓諸書輒解大義爲選壻甚嚴邑諸生王燕貧而有文譽歸焉事王姑三年事姑十年子堂開四歲而孤一女甫好堂開從弟學基又失父母爲拮据兼撫之後學基

受室數年，嬰始析，貞婦生二十年而歸，歸五年而寡，今六十有三矣。先是貞婦之王姑劉，守志五十年，手植桂一本，及尺歧爲兩，幹幹末復合，人以謂後凋之祥。閱世再應之，卽堂開之交，予志行不少苟，而謂不有是母哉。論曰：女子之德曰貞，凡不再適與不得已而殉者曰烈。元史亦曰：節，魏氏禧，區節與烈，與從容就義爲三。抑未審矣。唐堅貞節婦李及金節婦，皆夫死不再適者也。貞之名，祇以施之未嫁不再字之女。故近人文構題無稱貞婦者。宋景濂爲湯慕貞、韓惟秀、周淑黃守貞傳，則曰：節婦爲王妙清、王順榮、鄭妙靜傳，則曰：貞婦。二者實皆

無以異乃其言又云婦以節名非常也變也變而不失其正善之善者也然則處變而不失其正固女德之所以貞言貞而節在焉故以崑山張氏女子之節之烈而歸熙甫稱曰貞女子因堂開之請傳其母而正其名其不繫歐陽而繫王者不敢据史例例在景濂以徐定瑞爲趙節婦云爾

白華前稿卷第二十二

南漚 吳省欽 沖之

墓碑 墓表

中大夫大理寺左少卿何公墓碑

乾隆三十六年陝西文縣鄉賢大理寺左少卿何公之  
仲子渾以辛巳進士除廣東從化令將行介富陽董中  
允來謁曰先大夫之歿也有行狀有墓志有傳雖然嘗  
乞傳於太僕陳先生兆崙業許我而未就也今先生已  
矣願以屬吾子予惟古之人不傳人又國史三品以下  
例無傳傳略而墓表詳乃爲文以塞其請公諱宗韓字



桐藩一字對溪以廩膳生舉康熙戊子鄉試雍正甲辰成進士授禮部額外主事明年補儀制司主事又明年充山西副考官又明年遷祠祭司員外郎除江南鳳廬道按察司僉事入爲刑部福建司郎中旋擢大理寺左少卿予告歸此公出處厓槩也進士釋褐爲主事者需在部習掌故第隨人畫諾無可否三年後予真其能者始判牘時此制未定值重修會典自朝會郊廟壇壝至鄉會歲科試諸條制皆公釐請增定冊庫失金冊一鑄印局大使逮繫同官引罪請劾公抗言舍盜不問卽誅大使何益請會容提督九門勒番役緝之已而果獲盜

堂上官益器重公有欲舉公牧令以應

詔者太宗

伯蔚州李公持不可曰是豈百里才耶少宗伯江都唐公又以公賢能最

召對稱旨除分巡鳳廬道僉事

巡道治鳳陽督關稅稅口數十處官吏都數爲利苛覈毛髮公務持大體處膏不潤正羨悉貯之官又以養廉額未定首請歲支二千金而絕所部供餽朱家口海水決入安河壞泗虹田舍州牧言涸出地七千四百頃河臣言新淤湖田九千三百頃可起額佐河費公將以去就爭而太恭人訃至

詔在任守制假四月治喪事

竣莅官力陳泗民之苦有重糧旣報淤而又報涸者也

有賠糧本未涸而報涸者也夫一地二糧與無地有糧民弗堪也淤則淤涸則涸所不爲民者有如水於是按圖冊審而勢於安河兩岸每里封一大墩以牌記每戶封一小墩以旗記得地一千二百七十頃而向之詭報者十七八皆烏有故大學士尹文端公時撫江蘇以勘挑宿淤地邀公問狀輒太息以爲賢然公猶以瀕水地渰涸不常爲念歸田後恭遇今

天子特免湖河淤地錢糧見邸報感泣如身受也嘗奉檄查太平府及泗滁和三州逋賦分民欠官侵吏蝕爲三等以別償免鳳陽饑撥賑米未至發倉粟便宜應之

河南大水饑民就食江淮間者日數百千人公率屬爲粥以食或留養或資送贖其已賣之小口甚夥資送者日限程四十里壅滯不得前迺令倍行者予二日糧官民便之所全活無算六安潁亳間故藪盜公以淮水自豫入潁至盱眙老子山入洪澤湖迤邐千餘里致疎防禦遂創議置哨船增營汛其要害移文武員弁駐之裁道役及所屬蠹役千餘人曰此盜媒也驅歸農可矣於廬濬金斗河於宿引城北小河與澹灘二水通又鑿桃溝燕子口以洩蕭徐永城之水於英山請折漕價以甦艱運又言虹縣小河淤淺水發輒成巨浸疏小河以分

洩於淮疏舊溝以全洩於汴則虹不受水而靈璧兼受其利議雖格不行而公之心則已瘁矣文縣自前明王侍御繼禮以甲科起家後二百餘年至公而始賜進士釋褐甫四載卽歷監司顧性樸愿少結納又任事已銳不求合上官其奉命入覲也上官特以部民籲留爲紆半載限旣官西曹

上垂問淮南治狀公臚實以對

上顧廷臣曰鳳廬號難治何宗韓在官六年實心整頓而人反議其短長何也尋以甘肅晉蠲地丁條銀率衆表謝

上曰陝甘迺竟無大僚卽何宗韓可用遂擢少廷尉大司馬彭某以事置議或欲甚其罪公徐曰罪不至甚甚則不平入人罪以媚人不可其長卒上之

上弗以爲是而公屢沐異數二年中從耕藉扈駕上

陵侍經筵又請罷六曹委署官以重職守皆得

旨允行人謂

上將大用公會足疾乞歸歸而不復起嗚呼豈非命歟公十二歲試輒冠童子科旋喪父每作文長慟獻總帳前守部日以太恭人春秋高家貧將乞歸侍而淮南之

命下遣長君歸爲迎養計并盡室以行憚暑埃佳秋發  
板輿而太恭人疾遽作每語及銜恤若初喪足未嘗輕  
出城市過其廬淵然惟吟誦聲人有不善惟恐聞於公  
爲相語曰不畏王公怒但畏何公知王蓋時宰也其學  
以忠恕爲主著弟子錄者先後數百人必先以行誼相  
激厲乞休後置義田廣族葬焚貸券倡修文廟及陰平  
橋人或以是矜式公而不知公學問之本與夫大節所  
存爲不可沒也公所著族譜若干卷敦仁堂集若干卷  
以康熙十七年日月生乾隆九年日月卒十二年月日  
葬文臺西北阡先世常熟人明洪武初孟文公始遷秦

入傳而至呈圖是爲公曾祖祖道亨邑諸生安帝錫扶  
風縣教諭其在太學時與長洲韓文懿公友善也母陶  
太恭人配歐陽恭人公計偕後代公侍太恭人以終有  
孝稱後公三年卒子三長溥丙午舉人終江西臨川縣  
知縣次藩庠生次卽渾女二適某某孫五汝楫汝梁汝  
杭汝枋汝權曾孫四予竊按公之遭逢與其行誼庶可  
以不朽惜生晚不見公觀從化君之肫然血然旣葬二  
十餘年而不忘其親嗚呼其亦足以知公之教矣

贈中憲大夫光祿寺少卿前戶部河南司主事

趙公墓碑



乾隆三十八年春定邊將軍大學士溫公福次昔嶺討金川酋六月己丑朔美臥溝失守戊戌將軍以師退距木果木北嶺不數里歿於陳戶部河南司主事趙公死之越九日予聞自雅州試署爲位以哭又二旬聞

詔贈光祿寺少卿入祀昭忠祠

予祭葬馳驛歸里

蔭一子入監讀書期滿予官是冬小金川復平明年二月孤秉淵自京返旄而以書抵蜀先請爲隧道之交嗚呼公詩名在天下節義在國史有子世其業死亦無可憾而予言尤有信者憶戊子冬予使黔歸次淇縣時公坐漏言前連使盧見曾逮問事落職從雲貴總督今

將軍阿公桂討緬賊入滇驚相遇於道倚枯柳相泣語  
移時別其明年今將軍拜副將軍公從經略大學士傅  
公恒出萬仞關歷猛養猛拱攻老官屯十一月緬酋降  
而公病先入關以薦得旨候引 見又明年從副將

軍駐騰越防秋又明年辛卯十月討小金川公從溫將  
軍自永昌疾馳二十晝夜抵成都明年十二月小金平  
遂移討金川會予視學入蜀謂賊平可與公亟見而秉  
淵亦從予而西以次年閏禊日返自木果木軍營傳語  
予甚悉時公已遷官不三月而變作凡從軍六年至是  
而授命焉嗚呼難言矣公長子五歲丁卯秋以詩相質

於舉場始定交自後王光祿鳴盛吳舍人泰來王考功  
昶黃司諭文蓮錢詹事大昕曹申允仁虎在蘇州與公  
爲七子詩傳至日本其國相高樸爲七律人贈一章寄  
估舶以達人豔稱之而其後多自以少作爲悔錢以辛  
未奏賦行在授內閣中書至丁丑而王與曹繼之予  
亦與是選始過公高行之居癸未春兩家聯舫入京僦  
屋同與居後三年予弟攜家亦至居始析公兩放會試  
未得列館職而書局總裁官歷舉公分修平定準噶爾  
回部方畧御批歷代通鑑輯覽大清一統志及  
未成之音韻述微鑑古輯覽熱河志諸書均計日程課

自予入詞館所纂書尚多然不及公十五六而公又以  
其闕寧入西出保直草詔令賦詩談讌俱不廢或賣文  
以佐祿人所不逮去年春四庫全書館局開一時績學  
之士多奏名人翰林賜進士其與公同獲罪者皆起而  
公積軍功稱遷遇變又不爲同行者之苟免設公舉禮  
部必不直軍機不直軍機人知公學之博說之長而不  
知才之足倚以決事卽一言不密又非出有意退而授  
徒著書亦足以開益於人而傳於後乃援薦援留輾轉  
再四至以身殉爲可哀也公自爲高才生有忌而蠚以  
隱事者其人後公官中書以死視之猶刎首之一映卽

東華車馬不失職之文人所辛勤而僅有者不朽果安  
在也夫亦可無憾爾矣公諱文哲字損之號璞函世爲  
上海人學使者以孝友純密舉優行壬午應 南巡

召試賜舉人授內閣中書遷戶部河南司主事 特

贈中憲大夫光祿寺少卿曾祖繼膺祖璧國子生候選  
州同知父紳歲貢生兩世以公故贈徵仕郎內閣中書  
祖母張氏母張氏吳氏皆贈孺人配張恭人後公七年  
卒側室萬孺人子秉淵廕內閣中書秉沖監生入直

懋勤殿學泗醴源學海女一所著羣經識小錄若干卷  
文集若干卷嬀雅堂詩十二卷藏海廬詩四卷嬀鰥集

十卷詞四卷其歿也距生雍正三年九月二十九日年四十有九以年月日葬縣之某里

諡贈中憲大夫兵部郎中前貴州平越府知府  
孟公墓表

太谷東三里楊家莊西北原有貴州平越府知府孟公之墓公以府同知監督海運倉擢長蘆都轉鹽運使司運同授朝議大夫除知平越府乞歸三十年以子瀛官兵部車駕司郎中加二級封中憲大夫而卒卒之日乾隆三十六年五月十九日也距生時七十有八歲倉監督例以京察薦充公以府同知在選人會引見

世宗皇帝奇公才命爲倉監督得通之海運倉絕侵冒  
謹支放頓腋厥是歲他監督多以米汨爛被譴而公獨  
免協辦大學士武進劉公時總督倉場以明練勤慎薦  
改留任除開封府同知方引見卽擢長蘆鹽運使司運  
同公辭不勝任

上笑曰汝操守可自信卽才力患不及耶公益勵清白  
凡商竈陋規釐輦殆盡有鹽案結訟者聞勘諭往往散  
去在長蘆九年總督豐縣李公每以公第一廉吏也今  
皇帝四年除守平越平越訟繁而吏玩訟繫至數十年  
公置親催籤籤下而吏抗不上者罪其長於是吏盡畏

法不數月積案一空革雞廠漁利陋例建養濟院置義學苗民德之其以耳疾歸也扳送數十里不絕後大學士臨桂陳公每爲節相張公言公賢張公屢致書勸公起公嘗以言事過仇忤張公而陳公與公官天津久故知公深而公卒無出山之志矣公十歲而孤又善病少長就鑒京師有間歸不忍以曠母養弟某不逮見贈公公撫愛備至歷五十四年又撫其子五人今有至郡守者然終以弟故常卹卹若有所失每燕語必引贈公爲言贈公嘗倣范文正義田法贍族人公踵成其事所訂條制多可行歸化等城裁兵遺屋數千百間令居民買



之公首應其募買大半天津鹽關渡口浮橋今謂之孟公橋者亦遺愛也平生嗜讀易倚琴學書勒石十餘種訓子必義方憶己丑夏公季子淦省其兄工部君來都從予遊兩落京兆試始歸今年春公強淦復行且屢誠工部君母乞養故公之歿也惟兵部君視含飯公諱周祚字廉夫一字素臣山西太谷人先世仲明公遷自陝西之固原州曾祖某祖某父某皆贈朝議大夫祖妣某前妣郭妣王皆贈恭人娶胡氏封恭人有婦行祔公墓生兵部君者也子四人瀚太學生先卒次卽瀛次满工部郎中次淦貢生瀚母李太孺人满母王太宜人淦母

胡太孺人女二人適溫有直員璵孫四人公於鄉邦多可稱又葬令五品以上墓立碑龜趺螭首故於年月日葬公因諸子之請而爲之表

贈奉直大夫前江西廣昌縣知縣孟君墓表

君諱佺姓孟氏字瀛海其先自鄒遷麻城前朝諱正朝者再遷蜀之中江五傳至醇以舉人選知鄒縣下車日拜亞聖祠下然後到官多惠政卽君祖也父念先歲貢生母主孺人君兄弟凡四長侯康熙補行辛酉科舉人次雋西昌縣訓導次卽君次傳廩膳生一門切劘文行日卓年十五補學官弟子員試輒第一康熙乙酉舉於

卿試禮部不利遂不復赴及資筮仕令江西之廣昌廣昌俗故悍訟牘積以千計又前令賓幕多與胥吏通寅緣上下昵伺得間乃手自剖決對狀恒夜分不少休雍正初令攤丁歸地軍與民均勿論而邑中軍籍多有詭寄請託者君釐頓如法又閩民寄莊者以數年爲率抗土民租不償催督則又颺去君申請大吏移咨閩省各飭令詣廣量其所負差次以償前侍講饒濟南學曙童試時君目爲國士後一甲及第焉君內行肫篤未弱冠以一身任家政旣歌鹿鳴涕淚時被面謂明經君不逮見爲恨其不再試禮部也家故貧不能做裝且懼違王

孺人養於城門構數椽灌蔬藝麻取給甘旨遂初抵家  
纔圖書增數千卷而已憶戊子秋予偕君之孫侍御君  
邵主貴州試貴東道廣昌魏君齒已宿矣向侍御誦君  
治邑時讞詞以謂神明宰而侍御京邸在南城極東予  
每過訪僕御輒以爲疼詢之故廣昌會館廣昌之在京  
者貶直以僦焉嗚呼卽君可知已君壽八十有五某年  
月日生某年月日卒某年月日葬某地配李宜人壽不  
滿百者僅三歲子二長衍鄒昭化縣訓導次衍興安徽  
直隸廣德州州判女三李適可立士標其壻也孫五即  
廣東欽州州判邵庚辰進士山東道監察御史曩偕予

使黔者也

封奉政大夫田君墓表

石門北鄉仁字坪之原有封歸然故永順王邨司巡檢  
累封奉政大夫田君之生顯而其配姚宜人先以窆者  
也君諱朝泰字鄰哉一字菱齋先世故汴人姓方氏建  
炎間祕書丞誠扈蹕南遷墓在今石門南津鄉十傳至  
明聰贅於田因襲田姓又七傳至贈奉政大夫錫祚生  
朝豫太學生朝需邑庠生朝恒歲貢生而君於次爲仲  
幼多病讀書了大義去爲賈又不習乃走京師給事館  
閣間敘選得湖南湘鄉縣武障司巡檢改駐婁底市以

憂去踰十年補安福之九谿

今裁

又八年調永順之王邨

又十一年引疾歸是爲乾隆三十二年年六十有八矣  
王邨故施溶土司境山十田一苗民錯居君不紆不競  
羣樂無事去之日扳留祖送者數十里不絕其在婁底  
購竹木創官署絲毫不以累民不好治生產居憂時餽  
粥或不繼姚宜人績紵以佐其與人不立厓岸而教子  
孫日嚴祭掃之役至老弗間間舉豆觴與里中諸高年  
偈眞率之會燈下向紅箋作小字今年春以姚宜人薨  
厯十八年爰卜地襄事廬其左以待七月日病革遺命  
臘月日必治葬毋久殯於家嘗論古之卜葬七月五月

三月不同其時無不族葬故窆穴不必豫計惟衣衾棺槨時制歲制不以辦於孫後世兆域各判凡七十以上當如趙岐司空圖故事預爲之藏以君之知禮善俗其爲政必有以審乎物之宜而給乎人之欲乃俛首下位弗竟其所用而又無有如宋金華之書萬安丞歸震川之碑安亭揭主簿者俾有聞於後則表其墓烏容已耶君以康熙三十七年月日生壽八十有三姚宜人太學生鳴虞女有婦行子男三尹衡癸酉舉人荊州府同知庾成早卒琦紳廩貢生候選訓導女二適歲貢生金鑾太學生沈星聚孫四孫女五曾孫二

太學生查府君墓表

外姑陳孺人以乾隆二十九年正月日卒於內寢將啓  
外舅轉庵府君之窆而耐焉於是其女夫吳省欽爲文  
表諸墓曰府君諱澤祺字介壽以康熙三十六年六月  
日生乾隆十五年七月日卒十七年十月日葬金山縣  
列字圩先世本休寧夏氏至正初有貢士諱順者於查  
爲甥因後焉子孫遂爲查氏高祖應光萬歷丁酉舉人  
浮家吳越間卜宅婁縣今諸孤所居者也曾祖維衡國  
學生贈雲南晉寧州知州祖學謨候選訓導以伯兄學  
詩登順治丁酉賢書陷於讐毀家救之得減戍父廷倚



增廣生有文行自號曰檢齋與俞檢討長城戴修撰有  
祺張吉士昂兄貢士廷瑞等名相埒母朱孺人少讀書  
輒了大義檢齋公嬰疾旣不支而外若無甚苦君謹視  
湯藥不稍離疾且華指牀下罌謂曰是有藏金兒年  
少未能支門戶其取是君泣且辭召諸兄共守而後發  
金以朱孺人合葬檢齋公於休寧入嚴瀨溯新安江時  
諸溪驟漲途間饑疫洊臻君往反累月得無恙一蔬一  
果罔不薦時祭罔不誠爲家人言祖父事輒涕泗交頤  
叔兄疾以君不相負屬撫其孤生平惡聞人過嘗觴客  
以唐賢看竹到貧家句政觴或誦竹如菊舉坐匿笑比

至君君如或所誦退而曰吾以分謗也召譽不必多蒙羞不必大人由是多君爲長者朝貴某與君世往來以父執自居君引後進禮而退有請君婚者聞其由胥吏入官辭勿許性敦樸荀彘輩既傲若新嗜習書一紙輒作千百字反覆縱橫受墨無間讀書有所得闢錄輒扶寸慕公子荆之爲人勝所居曰南楚酒人三四輩以次相過從君飲最多而酒德亦以君爲最暇則養花埽地蕭然若退院僧富人子厚於君知君有遂室邏者不能偵請餌爲博場公謝不能容乃止蚤歲遭難旣乃益自刻厲故自號轉庵作轉庵說配潘孺人何孺人再繼

陳孺人有壺行爲君生子三實穎實苞俱太學生次實  
秀女三歸子者長也次許嫁宋森森天守志不奪次適  
太學生吳淦孫六

誥封恭人張母馬太恭人墓表

恭人姓馬氏曲沃明經我山君之孫觀察湖南驛鹽道  
張君泓之母而駐防京口鑲藍旗協領右丞公貳室也  
生五歲而孤母孺人殉死乃育於明經君君善醫居邑  
之侯馬鎮協領公先有事於陝道侯馬幾殆君瘳之遂  
如平生懼旣別去公駐京口不聞問者有年而公之友  
山陰鄭夢周者亦嘗以異疾留鎮療於君將歸懼復作

乃資君以家而南時恭人甫九歲也公艱嗣此於神神  
大書旁枝字示之因遺鄭書語其事君見之詫曰是張  
公子耶是國器後必昌第得以弱息侍巾櫛吾投老台  
蕩間矣公固辭而君意益決公配白淑人贊之閱數年  
始歸侍公公與淑人以爲賢渾委家政協領故旗員秩  
尊而祿不贍本旗甲戶絕率以家中壯丁隸之恭人從  
容請曰吾家食指繁取甲戶以贍我丁甚善然本旗非  
無材貧者抑又甚盍慎選而與之公喜遽言於將軍著  
爲令淑人旣善病病累月不解厠踰牀簀恭人必親之  
當飲藥弗嘗弗進曰吾非直謹嫌抑春秋之義也公歿

後四年歲壬子，淑人疾且亟，徧召諸宗黨，使以稱已者稱恭人。恭人泣固辭，乃止。觀察君之生，恭人自爲乳甚慈，而所以教之者嚴。君以國子生試於朝，中選第二，洎爲選人，產日落，仰食者尚千指。恭人節縮衣食，乃措柱焉。旣祿，養疏布如故。子婦敦勸之，則歎曰：「汝父汝嫡，俱不逮汝養。吾見汝今日幸矣，忍自泰耶？」君嘗以劍川牧改提舉，黑井而劍賦逋累千代者，拒不受。恭人質釵釧佐君以償，而劍又地震，壞民舍萬有八千餘。君奉命復回劍，善災後。劍人頂香遶恭人，興哭不絕。恭人命君徧示山谷，所代償勿復追。君膺薦入覲，未出都，擢

守衡州遣人迎恭人於劍劍人德恭人立碑爲長生位  
於報國寺恭人不佞佛而雨暘一愆憂禱忘寐君牧兩  
迤者十四年所境未有旱潦斯恭人積誠之感已憶庚  
辰予至長沙恭人開八秩嘗代爲文以壽故知恭人者  
稔今君持狀來請謂礪石待表墓之文予惟昌黎始爲  
鄭夫人殯表元潘景霄謂墓表之制畧述其世系行實  
而刻於左方轉及後右而周焉婦人則俟夫葬乃立面  
如夫亡誌蓋不忍其親之亡而事必師古君可謂知禮  
也已恭人以康熙二十年三月五日生乾隆二十七年  
十二月十二日無疾卒其明年十月十一日於定興東

冊邨之東啓協領公墓附焉子一卽觀察君孫三允植  
樹敏杞書之補窆石之闕云